



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma : f Tir Yimiyim

Instagram tiryimiyim@aolima

YouTube tir yimiyim

TAPAK 3



Union minister Piyush Goyal Rajya Sabha nung House lenir shim



Assam nung maneni khateptsü: CM Himanta

VOL. XVIII NO. 271 (ADOK 271) DIMAPUR

YANGTEPNÜ (THURSDAY)

CHITENI (JULY) 15, 2021

₹ 5.00

July 18 nü Kohima-Dimapur 4-lane lenmang shibangtsü

Dimapur, Chiteni/July 14 (TYO): Tang teyangludak Kohima-Dimapur 4-lane lenmang nung amshiba Peducha nung 'bridge deck' alemba maparen tiptema inyakdaksütsü mechi July 18, 2021 (Deobar) anogo iba

lenmang nung anepdang 4:00 ako nungi anüngdang 12:00 ako tashi iba lenmang nung gari mesenzüdaksütsü, ta Deputy Commissioner Kohima, Gregory Thejawelie, NCS ajanga sangdong ka nung metetdaksü.

July 20 nü HSLC & HSSLC results adoktsü

Dimapur, July 14, 2021 (Agencies): Nagaland Board of School Education (NBSE)-i July 20, 2021 nü High School Leaving Certificate (HSLC) and Higher Secondary School Leaving Certificate (HSSLC) examination 2021 indang results metetdaksütsü.

HSLC examination 2021 nung kaketshir 23,612-i provisional examination centres 133 aser sub centre 4 nung tatidang agütsü. Maneni, HSLC compartmental examination 2021 nung kaketshir 742-i examination centre 41 nung tatidang agütsü liasü.

Iba osang ya Bodbarnü NBSE chairman Asano Sekhose-i metetdaksü.

Külen, HSSLC exams nung kaketshir 16,835-i provisional examination centre 96 nung tatidang agütsü. Parnokji Arts - 13024, Commerce - 1347 aser Science stream - 2464 liasü.

Nagaland nung HSLC aser HSSLC tatidangtem ya taküm April-May nung agi. Online ajanga results reprangtetsü aser marksheets download sütetsü.

HSSLC tatidang agütsürtemji tetsür 8641 aser tebur 8194 lir.

Arrotsü mangatetep atema sorkar kechi tebilemba ali: NPF Mokokchung

Dimapur, Chiteni/July 14 (TYO): Kidanger state, Assam den arrotsü dak sendakba ken o mangatetep aliba tensa tamajungba kuma mazüokteti maodang Nagaland sorkari teinyaktsü mapa inyaktsüka, ta Naga People's Front (NPF) Mokokchung Division ajanga sangdong ka nung ashi.

Mokokchung Division ajanga asüngdang.

Arrotsülen Naga nunger yimsüngtem nung Assam police arua aliba ajanga yangji alirtem aonunga junga amoa moteter aser lanurtem kanga jashia lir. Tia maka lendong timtem kar ataloknung shir khuret asütsü, NPF

Nagaland sorkari iba ken o ya tekeratiba nung tematiba jenjang nung benoka aser süoki ia inyakteptsüla, ta sangdong ajanga ashi.

"Assam sorkaribo Assam-Nagaland arrotsü tongtipang tesemtem nung police battalion camp tem amenoktsü asoshi Assembly session nung jembia lemtetogo. Anungji Nagaland sorkaria iba dak sendakba nung kechi telangzüba agütsütsü, mesüra ola madoki repranga atatsü?" ta NPF Mokokchung Division ajanga sangdong nung asüngdanga liasü.

Sorkar mapa inyakertem indang DA 28% tutsüogo

New Delhi, July 14, 2021 (Agencies): Prime Minister Narendra Modi-i aniba Union Cabinet-i Bodbarnü Dearness Allowance (DA) aser Dearness Relief (DR) 17% aliba nungi 28% tutsüogo.

tutsür 28% kümtsüogo" ta Minister Anurag-isa ashi.

"DA aser DR rates atuba ya July 1, 2021 nungi asütsü aser iba ajanga centre sorkar mapa inyaker nisung lakh 48.34 aser pensioner lakh 65.26 ajangzüktsü" ta Union Minister Anurag Thakur-i metetdaksü.

"DA aser DR ajungkettsüba ajanga sorkar senpong nung kümshia Rs 34,401 crore talila endoktsü" ta paisa shisem.

DA aser DR installments ya küm nung pezüben- January 1, 2020, July 1, 2020, January 1, 2021 aser July 1, 2021 anogotem melenshir.

Ajisüaka, January 1, 2020 nungi June 30, 2021 tashi indang DA aser DR ji 17% dang asütsü, ta Anurag Thakur-isa metetdaksü.

Dokan kiburtem aser aonsotsü ayokertemi vaccine agitsüla Vaccine magiba health worker temi anogo 15 shia tendangtsüla

Dimapur, July 14, 2021 (TYO): Dokan kiburtem aser aonsotsü ayokertemi COVID-19 vaccine agitsüla ta Principal Director, Health & Family Welfare, Dr. Neikhrilie Khimiao-i Bodbarnü metetdaksüogo.

District ajak nung Chief Medical Officer/ Medical Superintendent temi dokan kiburtem aser aonsotsü ayokertem dak temolung agütsü vaccine agütsütsüla, ta Principal Director-isa tetuyuba agütsü.

worker temi shirangertem, külem inyakertem aser lokti kümzüka ayutsü atema anogo 15 shia COVID-19 tendangtsüla, ta paisa ashi.

Dokan kiburtem aser aonsotsü ayokertem COVID-19 menaba dang masü saka tangar dak menadaksütsü ana nung lir, anungji parnok nem COVID-19 agidaksütsüla, ta Principal Director-isa ashi.

Maneni, Dr. Neikhrilie Khimiao-isa nija aser sorkar mozü kitem nung vaccine magiba Health worker tem dang COVID-19 negative test certificate agütsütsü tetuyuba agütsüogo.

"District ajak nungi Chief Medical Officer/ Medical Superintendent temi iba mapa tetuyuba ama mapa inyaktsü aser District Task Force-ia nija mozü kitem nung mapa inyaktsü tuyur" ta Principal Director, Dr. Neikhrilie Khimiao-isa metetdaksüogo.

Vaccine magiba Health

COVID-19 Nagaland: Nisung 109 dak putet, 2 asü

Kohima, July 14, 2021 (TYO): Bodbarnü Nagaland nung nisung 109 dak COVID-19 aliba putet aser nisung 2 asü.

Parnok züngsema nisung ajak agi 23,987 kümogo" ta paisa ashi.

"Mongulbar tashi nung nisung 5,27,033 nem COVID-19 vaccine indang dose 6,29,471 agütsüogo" ta State Immunization Officer, Dr Ritu Thurr-ia ashi.

"Tanü nisung 109 dak COVID-19 putet. Parnokji Kohima nung 55, Dimapur nung 25, Mokokchung nung 23, Peren nung 3, Wokha nung 2 aser Mon nung 1 lir. Parnok züngsema nisung ajak agi 26,249 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

Nagaland nung COVID-19 nungi taneptsü angurji 91.38% lir aser tang nisung 1,017 anepaludar, ta Dr Kikon-isa ashi.

Vaccine agirtemji frontline workers 60,369, healthcare workers 15,863, arishi küm 45 ser tempur 1,66,805 aser arishi küm 18 nungi 44 tsüngda alir 2,83,033 lir, ta pai metetdaksü.

"Bodbarnü COVID-19 puteta alir nisung 49 taneptsü angu. Parnokji Kohima nung 27, Dimapur nung 7, Mokokchung o Phek nung pungugu (5), Mon nung 4 aser Longleng nung 1 lir.

Tanü Kohima aser Mokokchung nung COVID-19 puteta alir nisung kaka asü aser tena züngsema tasür ajak agi 516 kümogo saka nisung 14 bo tanga tashidak ajanga asü, ta paisa metetdaksü.

Vaccine agirtem rongnung nisung 1,02,438-i dose anaprong agiogo. Parnokji frontline workers 33,333, healthcare workers 11,341, arishi küm 45 ser tempur 57,621 aser arishi küm 18 nungi 44 tsüngda alir 143 lir, ta Dr Thurr-isa ashi.

Mosque temeket nung ak tepsetba aser shi ayokba noktangtsüla: Assam MP



Abdul Khaleque (File photo)

Guwahati, July 14, 2021 (Agencies): Assam nung Barpeta constituency nungi Congress MP Abdul Khaleque-i Assam Cattle Bill atema Assam sorkar aitsüogo.

nung ak shi achiba noktanger" ta MP Khaleque-i ashi.

secretary Padi Richo-ia Assam nung BJP sorkari nashi belenba noktangtsü indang bill benokba magizüker ta metetdaksüogo.

"Tekülem ki telongtet kilometre 5 nung nashi tepsetba aser shi ayokba noktanga, mosque telongtet metre 500 nunga ak tepsetba aser shi ayokba noktangtsüla kechiyong Islam

"Assam sorkari Assembly nung Cattle Bill tasen benokba nung mosque anasa ak metepsettsü aser shi mayoktsü enoksemra kanga liromedemtsü" ta paisa ashi.

"Iba ozüng ya yanglura Northeast state aika nung nisungtem timtemtsü kechiyong nisung aika nashi ayokba ajanga pei tepok mesür" ta Padi Richo-i ashi.

Assam Cattle Bill yagi state nung ozüng alema inyakertemi nisung tepsettsü ajungmesotsü. Assam Cattle Bill nung lateta aliba onüktem ya külen tsütsü dang lir aser BJP-RSS indang alizüng tongtsütsü atema lir, ta Congress MP Abdul Khaleque-isa metetdaksü.

Shishilembartemi linük kübok tangalen nungi Assam adena nashi bener aru aser iba tenokdangba ajanga parnok inyakba wadang mali akümstsü, ta paisa ashi.

"India nung senso shia ket nung kechi achitsü mesüra machitsü temeten lir. Constitution of India ajanga iba temetenji agütsür. Muslim nungeri nashi shi mechira pa Muslim masü ta meshitettsü. Iba tangatetbaji tai lir" ta Khaleque-isa ashi.

"Assam sorkari ano agri aser rice products abenba noktangtsü tsübur. Tanü parnoki nashi noktanger süra, asüng agricultural products belenba noktangtsüa akok aser state aika timtemtsü" ta Padi Richo-isa ashi.

Külen, North East Congress Coordination Committee general

"Arunachal Pradesh ya tang tashi consumer state ka lir aser supply ajak bener arutsü atema Assam dak dang metaloka lir" ta paisa shisem.

Covid-19 tashidak nokdangtsü atema senso shia teinyaktsü asem :



Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.

Kohima Law College ketdangsürtemi KODH semdang



KODH nungi tanurtemi July 14, 2021 nü violin amshia ken ka agi shilem agiba noksa nung angur, koba AR Rahman indang Sunshine Orchestra nung shilem ka liasü.

Dimapur, Chiteni/July 14 (TYO): Kohima Law College nungi Assistant Professor aser non-teaching staff remi July 14, 2021 nü Kohima Orphanage and Destitute Home (KODH) semdanga COVID-19 tashidak agi alima ajunga sünger lia parnok indang welfare fund nungi mapa tajung inyakba atema pelaba lemsatepa liasü.

Kohima Orphanage and Destitute Home (KODH) indang chapel hall nung Asst. Professor Kezhokhoto Savi-i anir fellowship ka agiba mapang Asst. Professor Tompok Pongener ajanga tajungshi o jembi aser KODH nungi tanurtemi violin amshia ken ka agi shilem agia liasü, koba AR Rahman indang Sunshine Orchestra nung shilem ka liasü.

Sentong nung asür Zaputuo-ii Angami'er jala Nibano-i jembiba mapang, KODH nungi tanurtem aser parnok tarutsü wadang asoshi shisabulua bilemba lemsatep,

shirnok aika Master Degree renemer training course agir, saka küm tetenzüklen Deputy Commissioner, Kohima nung meshiba 'Indigenous Inhabitant Certificate' tang tashi monguteti lir, ta ashi.

Lai item tanurtem meimba indang lemsatepba mapang, tanurtem ya parnok tsüraburtemi magizük aser parnok indang educational document ajak nung Zaputuo-ii Angami'er tanurtem ta tenüng yoka lir, ajisüaka parnok ya Naga nung lir, kechiaser parnok indang tsürabur chichiba ya Naga nung lir aser Nagaland kübok kin balala nungi lir, ta ashi.

Nibano-i nüktzü yima, KODH nung aliba tanurtem ya Nagaland sorkar nungi 'Indigenous Inhabitant Certificate' angutsü temsüa lir, ta shia liasü.

Lai tesemdangertem dang iba certificate angutsü asoshi lenmang sayuang, ta teyari asüngdanga liasü.

Iba dak sendakba nung tesemdanger temi Kohima District Administration dang KODH nung timtem ajuruba reprangtsü mepishia liasü.

Zaputuo-ii Angami ya Kohima nung sorkar meyong mozüki ka nung nurse inyakba mapang KODH ya 1973 küm tenzük aser meimchir tia tamajung jenti ajangshiogo, ta Asst. Professor Kezhokhoto Savi-i ashi.

Künü anogo tetsür ka mozüki nung tanur asoba mapang asü. Aser tanur tebui iba tanur ya anepalua reprangtsü melen yangji yutsür ao, anungji Dihoma yimtsüing nungi Angami tsür Zaputuo-ii ajanga telemtetba agia la takum melenshi.

Tsüraburtemi senzüka yutsüba tanurtem ya Kohima arem min balala nungi aser leper nungia bendener. Mesüra tsüraburtemi makamait mechi pei tanurtem KODH nungya yutsür, ta sangdong ka ajanga ashi.

Nagaland Police Family Welfare Association-i mozü tenla agütsü



Nagaland Police Family Welfare Association (NPFWA) tenüng nung unit hospital, DEF, Kohima aser 4 NAP nem mozü tenla agütsübo noksa nung angur.

Dimapur, Chiteni/July 14 (TYO): July 14 nü PHQ Conference Hall, Kohima nung sentong ka ayongzüka agiba mapang Sandeep M. Tamgadge, IPS, ADGP (Admn.) kinungtsü aser Arobic Remedies and Pharmaceuticals Pvt. Ltd. Managing Director Leena Tamgadge-i Nagaland Police Family Welfare Association (NPFWA) tenüng nung unit hospital, DEF, Kohima aser 4 NAP nem mozü tenla agütsüogo.

Leena Tamgadge-i, sepai aser parnok kibongtem ajangzüksü timla nung mozü tenla agütsüogo ta ashi. Laisa, tarutsü nunga teyari agütsütsü mulunga aliba lemsatepogo. Renchamo P. Kikon, IPS, ADGP (L & O) kinungtsü Polem Kikon-i, DGP, Nagaland, T. John Longkumer kinungtsü tenüng nung o jembi.

Kasa mapang nung Nagaland Police Family Welfare Association (NPFWA) tir Mesangla Longkumer-i,

Tamgadge nem la mapa tajung asoshi tenüngsang agütsüba den Nagaland Police Family Welfare Association (NPFWA) inyakyim metetdaksü.

Iba sentong nung Special Secretary (Home) S.R Saravanan, IPS, kinungtsü Reshmi Saravanan kinungtsü aser SP (Crime) Manojkumar A. IPS kinungtsü Saranya Manoj nata dena liasü. Sentong ya RMO, DEF, Kohima, Dr. John Khuvung lenisüba nung agi aser pai tepela anküp o jembia liasü.

NPCC-i Zhekhuyi Chishi asükhu lemsatep

Dimapur, Chiteni/July 13, 2021 (TYO): Ghaspani-I ACCC tir, Zhekhuyi Chishi asüba osang angashia aoksar Pitali, chirnur aser adianutem den mangyim jashi lemsateper, ta NPCC tir, K Therie-i sangdong ka nung ashi.

Asür Zhekhuyi Chishi ya Congress atema bendanga agüja inyakba nübu ka liasü, shibai mapang aoba mesasai Congress indang asalentong aser mapatong takok ngudaksütsü asoshi shisatsü agüja aser meranga inyakogo, ta ashi.

Mapang ajak nung office nung mapa inyaka, senden aser party maparen balala nung pai temolung agüja metitemi inyakba ajanga iba Party nung

pai bendanga agütsür inyakba kuli sayuogo.

Zhekhuyi Chishi taküm alidang, party atema pai bendanga agüja inyakba mapa tajungtem teti bilemtetsü. Asen lokti nung terenlok lidaksütsü aser ajungkettsütsü asoshi inyakba mapang nungita yariba atema asür Chishi aser par kibong dang pelaba metetdaksür, ta Therie-i ashi.

NPCC nung külem inyaker ajaki asür Chishi-i toktsür aoba adianutem den asükhu lemsateper. Kecha agi melentetsü makokba takoksa aser tejashi mapang, Tulusang Tsüingremi nü nem tesünep agüjangma. Tsüingremi pa tanela tesünep nung anisüngzükjangma, ta Therie-i lemsatep.

Seitheke Basti anasa sepaitemi NSCN (IM) züingsem ka apu



Dimapur, Chiteni/July 14 (TYO): Security Force temi Police den lungjemer July 11, 2021 nü operation ka agiba mapang NSCN (IM) züingsem ka pua liasü, ta sangdong ka ajanga ashi.

Osang tejangja ka nung ajemdaker sepaitemi general area Seitheke Basti, Dimapur anasa operation ka agiba mapang NSCN (IM) züingsem ka apu aser pa ket nungi AK 56

Rifle asem den magazine pezü, point 22 Rifle ka den magazine, injang 87, sen crore ka shi jenjang Rhino Horn (Küntok tezü) ka den Telescope Sight ka nguteta liasü.

Iba dak sendakba nung ken o maneni bushisüngdantsü atema pua alisang den pa ket nungi ngutetba osettem ya Chumukedima Police Station, Dimapur nem amoktsüogo, ta sangdong ajanga ashi.

Tening CHC nem medical oset tali agütsü

Dimapur, Chiteni/July 14 (TYO): Advisor, Water Resources, Namri Nchang lenisüba kübok Community Health Centre (CHC), Tening nem Delhi nung amenoka aliba Democracy People's Foundation and United Way of India ajanga Oxygen concentrator pongu agüja liasü.

Iba teyari ya Breathe Easy Consultancy aser Additional Deputy Commissioner, Tening, Rhosiotho Nguori, NCS teyaritip nung bener arua liasü.

Item oset ya EAC Tening, Tumben P Tsanglao, NCS ajanga July 14, 2021 nü agütsü aser MO AYUSH, CHC Tening, Dr. Nuksang Jamir ajanga agizüka liasü.

Iba oset mapang shidak

nung bener arua tongtsütsüa maparen balala nung shilem agir ajak dang pelaba lemsatepba mapang, Oxygen concentrator talila benoksemba ya ajanga tawa semzükba Community Health Centre nung nüngdaka aliba ama nübur tali timba yaritetsü, ta Medical Officer ajanga ashi.

Kanga nüngdaka aliba oset bener arutsü asoshi senotsü bushia lenla balala nung yaritipba kija, lokti aser tetenlar ajak dang kanga pelar, ta pai ashi.

Dr. Jamir-isa sub-division nung tawa upgrade asüba CHC nung health services tali tajungba kumdaksütsü atema Medical Officer aser Staff talila nüngdaker, ta ashi.



Bodbarnü arishi küm 82 tain Satyadev Narayan Arya-i Tripura nung Governor inyaksü atema tezüngzüktep agidang tangokba noksa angur. Arya ya Tripura nung 19 buba Governor asütsü aser Raj Bhawan nung chief minister Biplab Kumar Deb, Speaker Rebat Mohan Das den tongti ketdangsürtem lia pai tezüngzüktep agi. (Agartala, July 14)

Cattle Preservation Bill ya nüngdak mali: Gaurav Gogoi

Guwahati, July 14, 2021 (Agencies): Assam state sorkari COVID aziokba aser vaccine agütsüba maparen shitak meinyaktetba miimbangtsü atema Cattle Preservation Bill ya benoker, ta Congress MP Gaurav Gogoi-i ashi.

"2021 election manifesto nung onoki district shia nung gaushalas yanglutsü nangzüka liasü. Assam Congress-isa BJP sorkar kübok Assam nung ozüngi memelaba cow syndicate indang ola adokogo" ta Gogoi-i ashi. Congress-i mapang talangka nashitem kümzüka ayutsü indang jembia arur.

Cattle Preservation Act of

1950 yanglua lir anungji ozüng tasen ka yanglutsü nüngdak madoker. Iba Bill nung aliba onük ajak 1950 ozüng nung lir. Anungji nüngdaker süra iba ozüng jiang yanglushitsüla. Kechiba ozüng tasen yanglutsü. Sorkari nashi shibelenba atema ozüng tasen yanglutsü nüngdak madoker" ta Gogoi-isa metetdaksü.

"Iba Bill ya Act kümra Assam nung dairy farmers & cooperatives meyirjang aika samatsü" ta paisa ashi.

Assam nung sorkar taseni parnok bungalow tem tobur junga yangluba nung kanga mazünger saka külen state bo wara agi timtemer, ta Gogoi-isa sorkar aitsü.

"Sorkari micro-finance loans meyipa magütsütsü atema teyari magütsüter, nisungtem ration alitsü atema sen mali, saka public sen lakh aika endoka bungalow yanglushiba ya taaktsüka lir. Iba ya amajok nung sen endokba lir aser nübortem timtemba nung teyari kecha magütsür" ta Gogoi-isa ashi.

"Congress sorkari Assam nung dairy production ajungkettsü atema World Bank project ka bener aruogo. Assam nung nisung kati tashi mamshitsüla saka democracy indang ozüngtem aser tangatetba alitsü nüngdaker" ta Congress MP Gaurav Gogoi-isa metetdaksü.

Assam nung maneni khateptsü: CM Himanta



Assam nung police-i ozüng alema inyakerkem dak maneni injang amshitsü ta chief minister Himanta Biswa Sarma-i metetdaksüogo

Guwahati, July 14, 2021 (Agencies): Assam nung police-i ozüng alema inyakerkem dak maneni injang amshitsü ta chief minister Himanta Biswa Sarma-i metetdaksüogo.

Assam Police-i nisungtem dak injang khaloktsüba atema aitsüba mapang CM Sarma-i iba osang ashi.

Assam nung chief minister inyak tashi police dak amakba magizüktsü, ta Himanta Biswa Sarma-i ashi.

"Assam police amakertem nem telangzüba agütsütsü. Ni

CM inyak tashi iba inyakyim magizüktsü" ta pai metetdaksü. "Police dang parnok kümzüktsü asoshi mapa teinyak ta ni meshitettsü" ta Assam CM-isa ashi.

Tatalokba osang balala nung ajemdaker Assam Human Rights Commission (AHRC)-i ken o benokogo.

AHRC-i state sorkar dang police-i injang khaloktsüba atema bushisüngdangtsü tetuyuba agütsü. Tesüiba ita ana tsüngda police-i telungpur aser ozüng alema inyaker nisung 12

khasetogo. AHRC-isa Assam Police dang ita ka tsüngda osang agütsütsü mapang atakzüktsüogo. Ano, külen National Human Rights Commission (NHRC) tsüngdang Assam Police-i meimchir temeten alema inyaker ta ken o ka benokogo. Taküm May ita nungi tenzüker police-i 20 ben den teimba injang khatok ta ken o nung shia lir. Assam nungi Delhi nung lawyer Arif Jwadder-i NHRC tsüngdang ken o ji benok.

Meghalaya police reserve ka nung IED apok

Shillong, July 14, 2021 (Agencies): Meghalaya kübok East Jaintia Hills district nung Bodbarnü Improvised Explosive Device (IED) ka apok.

Tanü anüngdang 1:40 ako

meta East Jaintia Hills district nung aliba police reserves camp nung IED ji apok.

Iba lendong nung police ka yirua anepaludar ajisüaka nisung asüba kecha mali, ta osang ajanga ashi.

Samuel aser Rosy Sangma na asüba CBI-i bushisüngdangtsü

Shillong, July 14, 2021 (Agencies): Union Home Ministry-i Central Bureau of Investigation (CBI) dang Nagaland nungi lanur ana- Rosy Sangma aser Samuel Sangma na asüba bushisüngdangtsü tetuyuba agütsüogo.

Iba osang ya Meghalaya Chief Minister Conrad Sangma-i metetdaksü aser paisa Union Home Minister Amit Shah dang pelaba ashi.

"Nagaland kübok Dimapur nungi asür Samuel aser asür Rosy Sangma na asüba

bushisüngdangtsü tuyuba atema Amit Shah aser Home Ministry dang pelar" ta Conrad-i ashi.

Taoba mapang Meghalaya Governor Satya Pal Malik-i iba tatalokba atema Union home minister Amit Shah dang bushisüngdang asütsü atema shidi ka zülüogo.

Maneni, Tura MP aser taoba Union minister Agatha Sangma-ia Union home minister Amit Shah dang Dimapur nung lanur ana taitsü keta asüba atema bushisüngdang asütsü mepishia liasü.

Ni mashii mapang ka nung aputsü: Akhil Gogoi



Akhil Gogoi (File photo)

Guwahati, July 14, 2021 (Agencies): Sivasagar MLA aser Rajior Dal lennir Akhil Gogoi-i pa mapang mashi ka nung aputsü akok ta ashi.

Assam assembly budget session tenzüker anogo tasembuba nung Gogoi-i iba osang metetdaksü. Speaker aser Minister kari pa aitsüba sülen Gogoi-i iba olen jembii.

Session metenzükdang Gogoi-i yimjak nung osang prokshi ta tai tongloksür.

Iba ya 'Breach of Privilege' lir ta tangartemi aitsür.

Iba atema Chief Minister Himanta Biswa Sarma-i Gogoi merenshitsu takhangba agütsü.

Iba ashishitep onük adokba sülen Assembly Speaker Biswajit Diamary-i tang nungi session metenzükdang telangzüba magütsütsü ta osang

sangoktsüogo. Ajisüaka, Akhil Gogoi-i Speaker telemtetba magizüker ta noktakba aser iba atema Political secretary to CM, Jayanta Malla Baruah-i pa dang "iba ya lungkak aidak masü saka assembly lir" ta telangzüba agütsü.

Speaker Diamary-isa Gogoi dang assembly temzüng sülen anidaksü metetdaksü.

"Nai mezüng anogo MLA ka ama tezüngzüktep agiba biletmetang. Assembly telung nung nai ozüng kar sülen anidaksüla. Assembly nung nü indang tebilemtsü khuret kar lir" ta Speaker-isa pa dang ashi.

CM Himanta Biswa Sarma-i benokba Cattle Preservation Bill ya telok kar dak rangloker yangluba lir ta taoba mapang Gogoi-i aija liasü.

Pasighat jail nungi jena aoer ka apu

Pasighat, July 14, 2021 (Agencies): Arunachal Pradesh nung Pasighat judicial jail nungi jena aoer nisung 7 rongnung ka puogo.

Iba nisung ya Kalem Apang ta jangjaogo aser pa Mirbuk yim nung apu.

Yimertemi mapang shitak nung yaritepba ajanga Kalem Apang apu.

Mirbuk nung arishi küm 16 tain tanur kati Kalem Apang mezüng angu aser iba osangji WhatsApp group nung

lemsatop. Mapang tatsüka tsüngda yimdaklirtemi Kalen Apang jenoka aliba ki meketbang aser pa apu.

Iba sülen arishi küm 33 tain Kalen ji Pasighat police ket nung agütsü.

July 11 nikongdang Pasighat judicial jail nung puoka alir nisung 7 tashi jena ao.

Külen, East Siang police-ia Assam-Arunachal arrtsülen jena aoer nisung 6 aputsü bushidar.



TIR YIMYIM YIMOBILEM (EDITORIAL)

DIMAPUR YANGTEPNÜ, CHITENI (JULY) 15, 2021

Vaccine olulu ya sashira!

Pei temang nung tashidak agi matongtsü mesüra meshirangtsü atema agitsü asüyonga nisung aikati mozüjem agitsü tsübur aser mozüa mechner, aji nisunger yimya, anungji kechiba ajem atutsü tsübur aser mozü mechinür ta aibelen tuluka inyak amato aitsütsüa madoker, kechiyong tsüsubaji pei shisatsü dak keta alinungji metsübuli asüyonga tsübuadoker. Ashi, shibaibo kechi tsübnüa ali? Ajisüaka, tanü Covid vaccine agiba mapang ya mozüjem agitsü tsüsubaji dang masü saka iba mozüjem agiba ajanga temang nung tanga tashidak menar yakta asütsü, tetsürtem tanur mebenloktetsü aser Laishiba nung shia aliba temenen züngya 666 ajenloktetsü ta olulu tapu balala jembia nisungtem tsübudaktsüba yabo nisungtem ashioktsüba aser Tsüngrem o aibelena meyipzöker nisungtem tamang nung mashileni anitsü merangba tamashi mapa ka asütsü. Atangji, alima nung mozü dang masü saka nisungtem anisüngzüka lidaktsütsü asoshi scientist-temi purapiteta yangluba mapa aser oset tasen ajak mezüngbo nisungtemi amshitsü kanga tsübur. Aji oda, alima aso 19 buba nung Thomas Edison-i nisungtem tammang nung timmedemdaktsütsü asoshi electric light yangluteta tsükloka sayu saka iba jagiang nisungtem mulungjang nung tapu tapu bilema tsübutep. Iba tetsübu jagi tanga nung masü saka US tir alidak White House nung dena light tsükloktetsü tsübu bilem. Aji oda, Edisoni par kidang tama tsükloka amshia sayur külendang tanemtanemi nisungtemia pei kidang tsüklokyonga ao tenzüka nungi, tanübo asenok asoshi electric light ya taküm alitsü asoshi oxygen amai kümogo. Iba kasaji alima nung tashidak nokdangtsü asoshi mozü (vaccine) adok shia iba mozü dakji kanga temulung malemba telok ka adoker. Aji oda, tanü Covid vaccine indang tsübu jembiba ama, temeteter lima US nunga dena measles vaccine anema tamanger telok kati anemba ajanga 1990 kum Philadelphia nung aser 2005 kum Indiana nung iba measles wara ya kanga sashia poktetba otsü lir. Parnok jagi iba measles mozü jem anema tanü asenoki Covid vaccine dak temulung melemba jembiba kasa otem ya jembia aser yamaji lia kenü anogo, vaccine magiba tetsür chanu kati bendang lima nungi measles tashidak wara mesen menar aruba memeteti sentepi atu aser tenla kidang alirtem nem menaloktsüba agi tashidak wara ayimsünga aoba otsü tanüang atalokba amai jembir. Ano, Africa lima Camerron aser Nigeria nungbo Polio mozü tanurtem nem jemdaktsüba ajanga AIDS tashidak dena menatsü aser cancer dena adokdaktsür ta olulu kanga sashia jembiba agi, temeim agi polio mozü agüja jajartem dena tepsetba otsü lir. Aji oda, Afghanistan nunga Taliban teloki polio mozü ya Afghanistan nung nütüsung ajemdaktsütsü asoshi America nungertemi yanglua bener arua jemdaktsür aser iba mozü agütsüba ya Allah tsüngrem anema lir ta kanga sashia nokdang. Iba kasaji tanü asen lima nung dena Covid vaccine ya mozü masü saka nisung tepseter aser Yisu yimsü anemba mapa ka lir ta Laishiba tekong dena amshia nisungtem tsübudaktsür. Iba jagi, nisung aika terata aser tetsübu nung Covid jem magii lir. Ajisüaka, asenoki metettsüba kaji, mozü ya tapi agi yanglur masü saka tanga vaccine aser mozü yanglur scientist-temi nisung dak tashi tendanger külenang mozü aser tashidaktem indang bushiba nung mongin nisungtem alidak, World Health Organisation-i dena hau shitaka, junger ta tendangtet nungang nübortem nem agütsütsü melar. Alima nung Covid vaccine dang masü saka tilatiba agi, pain killer Paracetamol mozüjang yangluteter scientist-temi asenok ama tebilemba kisung agi shitak kümer jembiba nisung masü, saka nüken belem aika agia jungjunga bushitsüngdanga aiben tendanger külenang, yagi nisungtem temang ngoya-ngochiba anendaktsütsü ta jangjar aser nübortem nem agütsütsü yimten ajanga melar. Koba mozü südirsüaka mozü yangluba mapa ya mashi nisung kati inyaktetsüba masü, ibaibo Tsüngremer sayatenya mapa nisung ajanga inyakba mapatem lir. Atangji, alima nung Khristan-tem rongnunga karbo alima mozü dak mamangba purtem lir. Parnok jagi mozü machiyonga Tsüngremi aneptsütsü ta amanger. Parnoki yamaji amanger asünungji kechianga mashi, saka iba tangatetbaji, ashiko, Tsüngremia menünua bilema alitsüa akok. Aji oda, alima nung mozü machi ser shirang ajungtsü asünungbo, chi mechiyonga tebok asüngtsüla. Iba amaji, kasa Yisu dak amangertem asüyonga, kari Laishiba nung aliba tekongtem kar agiteta pei bilemba tsütsü atsünga meyiptsü merangdang nisungtem ratamatadaktsür. Aji oda, Laishiba nung tiyazü ainkertemji mozü bener medical doctor aser medical scientist-tem ama arutsü aser parnok jaki mozü nungji 666 züngya enoker temang nung enoktsütsü ta zülua lira, ajibo asen lima nunga laishir takotet aika lirji, parnoki ashitsüla. Asenokbo laishirtema masü aser medical scientist-tema masü, anungji temetetertemi asenok ajungtsü aser kümzüksü asoshi kechi ashir, idakji temulung lema anidaktsüla.

OLEMSABANG

RENEMA ATABA NUNG TAJANGZÜK

~ Jongpong Imsong

Kodang asenoki renema atatsü ta südir asen jakdang langka arutsü mesüra ataloktsü aliba ajanga ta angateter. Kechiaser tajung, tamajung koba südir süaka item tataloktsü asen jakdang aliba ajanga asenok kümzüksü mesüra samatsü ta asenoki jembiba indang angazüker. Renema atatsü indang lenmang aisü nungi lemsateptsü akok, anungji iba indang tali rajema angatetsü atema yamai kar shinür. Oda aiur ka aser asangur ka kibong akümtsü koda renema atatsü tamasa tena taküm nung kanga aroka shisadanga belemdangtsü tongtipang kaji tasübai mepiladaktsü meimtepa, yaritepa taküm rangben bendanga agütsütepa alitsü mulungtetba nisung ka bushitetsüla. Aser iba den ka mesüra kabo kechisarena ajak nung metsükdaki aser tebelemtsü makai kechisa ajurudir ajuruaka koktetsü aser kibong teimi anepalua litettsü asoshi ali rongsenren nunga aser kechi sempet keter Tsüngremi alimai yok, oda tekolok shisatsü amshia pei sasa meranga inyaka kibong rangben achaayanga mesütetsüsa renema akaba asütsüla. Kechiaser ibaji ajanga meimchir taküm nung tasüba dak alaka asenoki koktetsüba tebelemtsü, khuret aser lendong kechisarena ajak nungi wazüka taküm liyonga aotsü renemba indang tali tajungba aser tejangjaba angateter.

Alima poker soyapokyaa arudang tensa yari kechisarena ajak nung tataloktsütem indang shina aser takzüdakponga arubatem karbo asangsang nung ataloka aruba asen tenüki angur. Hau item ajakji ajanga asenok alima meimchertem asoshi terenemshitsü lenmang balala nungi tasatem angur aser tatalokba karbo asenoki kokyonga aoba angutsü. Aser item ajak nung nai aser ni koda renemer aser kechisarena lendongtem aser tebelemtsü asenok dangi aruba mapang nung kokteta asenok taküm kümzüka ayur. Tang asenok tendak COVID-19 wara indang jilia osangtsüsang balala tongtepratep sabang balala ajanga angashia aruogo aser aji oda tanübo asenok den külemi liyonga odagi. Aser 2020 kum asenok asoshi iba wara den raraba tatalokba aika asen nüki ngua aruogo, aser iba mezüng tzüsem agi asenok aika dak mteongi pei sasa kümdanga tashi anga aliba tajangzük tanü asenoki agia odagi. Aji saka tanabuba tzüsem ajanga asenoki teti meima aliba tsüraburtem, jabaso, jala tajungtem iba wara agi meshilangtsüba limai oadokogo, ya ajak angudang kanga sasasetem temulung kanga nemjema belemer. Ashioko tanü asen Nagaland nung yimten yimsüsürtem, lokti tentet balala den iba mapatong nung shirnoki anepalutsüla parnok ajanga bendanga agütsür temeim inyaktetlasang koda jangratemtsü süla. Aser iba den külemi ano asenok lokti, kibong aser kija shiai kechi terenemtsü liasü item ajak tasatem tonglatongsünga inyak asünungbo asenok rongnungi nebo tajung aika mesamala. Hauni, ya ajak rongsen teimi ketdangsurtemi meinyakba ajanga aser lentong asameyang ajak kanga junga aser jilia shisadanga inyaktet nungbo asenok nübortem jenjang tajungba nung lila. Aji saka kodang asenoki jungjunga bushidangdir kechisarena ajak nung lendong tonga arur dang renemtsü tenzüka tanü asenoki inyakyim aika nung tetsükdaktsü aika ngua aruogo. Saka tangar limabo joko kümzüka alitsü tasatem kanga jung inyak aoba angutsü, aser parnoki jilia mapatem ajak inyak renemshia alibayong taküm aika kümzüko, anungji asenoka parnok nungi angazüksü nungdaka lir ta angateter. Tanü Naga lima jila balala nung COVID-19 wara agi shirangertem anepalutsü asoshi nungdakba osettem aser mozü peria makaba den tesem peria renema makaba ajanga lendong tulu asenoki ajurogo. Iba den ano nisungtem kanga mejungi teimla makai shirangertem asoshi taktang, Oxygen, Ventilator peria rezünga renema makaba ajanga nisungtem aika timtem tulu ajuruba ajangshiogo aser parnok taküm kümzüktetsü lenmang sadema liasü, saka asenoki jilia renema mataba ajanga item lendong atalokba angur aser aseni teti meima aliba taküm aika samaogo.

Iba den ano asen jakdang COVID-19 tasembuba tzüsem arutsü indang tongtepratep sabang balala ajanga anogoshia arisangoktsüdag. Ashioko ibajia asangsang nung ataloktsü asü masü aseni talangdang ashitsü tamakoktsü, hau aji oda asenok ajaki ano tali züngkangshir koma, koda renema atatsü asameyang balala agi nübortem ajaki kümkümsüha tasa bendena tang mapang nungi renemshia atatsüla. Aser iba den Nagaland nung bangdak amertem aser Mozü ki balala ajak nungdakba osettsüsettem ajak teimi renema atatetlasang koda jangratemtsü asütsü aser kechi tzüsem aser mopung tesashi arudir aruaka Tsüngrem tadenba aser tanebtsüba den asenoki item wara ajak ajangdanga otettsüsa shi aser tanela rangben renemshia alitsü nungdaka lir ta angateter. Aser iba den asenok Khristanem ajaki metangdangi asen teyanglur Tsüngrem dang khukhua iba wara tesashi arutsüka alinunga wazüka tokjang ta sarasademtsüla. Aser tanü asen Naga lima nung maparen balala ajak nung lenirtem ajak nem Tsüngrem temeim angatetba den aria belemba mulungsentsü tajung den asen nübortem anepalutsü tangatetba aser tabensaba shisatsü agüjang ta ajaki sarasadema atatsüla. Anungjiang asen jakdang kechisarena lendong ataloktsütem ajak nungi jenbua aser renema ataba ajanga asenok taküm nung tajangzük aser temoatsü den tepela nung liyonga aotsü nükjidong aser teimla tulu agi temulung nung rezünga renemshia atatsü iba ocet ajanga lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

High Court-i Khristan putir, Swamy indang medical report meshir



July 06, 2021 nü Mumbai nung aliba Tenla ki ka kima Khristantemi Khristan putir, Stan Swamy nungtem nung ayongzükba sentong ka nung adenba noksa nung angur. Putir Stan Swamy ita 9 tashi tepuokdak ayuba sülen July 5 nü asü.

July 14, 2021: Bombay High Court-i India nung Khristan putir, Stan Swamy judicial ket nung lia asüba kuli jangjatsü atema pa indang health report agüjang, ta tuyuogo.

Arrshi küm 84, Swamy July 5 nü Mumbai nung aliba hospital ka nung asü, saka iba mapang nungji pa judicial ket nung aliba ajanga linük nung Khristantem densema nisung aikati sorkar anema ola adoker.

July 14, 2021 nü osangbener den jembidang Jesuit lawyer, putir A Santhanam-i, "Court-i tetuyuba kechisa agütsüdir agütsüyonga putir Swamay tasü nungi shia marutsü, ta onoki meteta lir, ajisüaka pa judicial ket nung aliba mapang nung asüba indang kuli tejangja onoki metetner," ta metetdaksü.

July 13 nü Maharashtra nung Bombay High Court-i state sorkar prison department

aser pa amongba hospital ketdangsertem dang putir Swamy indang health report agüjang, ta tuyu.

Swamy ya Parkinson tashidak densema temang nung timtem balala adoka May 28 nü Mumbai nung aliba Holy Family Hospital-i anir oa liasü; yaküm October 8 nü pa apuba sülen pa ita ti jungnüa lir sülen pa hospital-i anir ao.

India nung ozüing kübok ketdangsertem ket nung lia asüba tatalokba ajak bushisüngdangtsüla; ajioda Bombay High Court-ia pa asüba medical reports meshir.

Putir Swamy atema ken o jembitsür, Mihir Desai-i, Mumbai nung aliba Taloja Central Jail nung putir nem medical teyari shidak magütsüba agi pa süogo, ta tai tongloktsüogo.

Jharkhand nung BJP sorkar atsüingdoktsü atema Swamy-i

Maoists telungpurtem den asalentong yanglu, ta National Investigation Agency (NIA)-i pa nem tai tonglokja apu.

Maharashtra sorkari Swamy jail nung amongba, pa shirangba aser treatment agiba indang report agütsüogo aser Holy Family Hospital-ia court nem medical report agütsüogo.

Santhanam-i, Swamy asüba ya judicial ajanga bushisüngdangtsü Arogoi akhanger, kechiyong pa temang mejungi aliba osang tai courts nem agütsü, ibayongji pai bail meshiaka magizük, ta metetdaksü.

"Pa hospital-i anir aoba mapang nungbo pa temang kanga mejungi liasü," ta paisa ashi.

Bombay High Court-i July 19 nü iba ken o angadangtsü aser bushisüngdangtsü atema telemtetba agitsü, ta Santhanam-isa shisem.

China sorkari Arogotem indang WeChat accounts nokdangogo

July 14, 2021: China linük nung Communist sorkari maneni Khristantem anema inyaka linük nung register süa aliba Arogo aika indang WeChat accounts nokdangogo, ta International Christian Concern (ICC)-i metetdaksü.

China nung WeChat ya Arogotemi kanga sapua amshiba social media sabang ka lir. Ajisüaka sorkari linük nung register süa aliba aser sorkari agizükba Arogotem aika indang WeChat accounts nokdangogo.

Osang angazükba agi, June 7 nü sorkari Beijing Haidian Arogo indang WeChat account nokdanga liasü, aser kasa anogo nungjisa Shanghai Pure

Heart Arogo indang account-a aliba reprangdangyonga nokdang.

Taküm April ita tatembanglen nungi tenzüka sorkari online Christian platforms nokdang; April 29 nüa "Bible" mesüra "Gospel" ta zülua aliba Christian WeChat accounts aika nokdanga liasü.

Mongolbarnü (July 13) Zhejiang Province nung aliba Hangzhou Chongyi Arogoi züngsemtem dang, mapang tatsüka atema WeChat messages anena atatsü aser Arogo indang official website ajanga maneni osang lemsateptsü, ta metetdakja liasü.

Iba dak alia WeChats nung "Christ" mesüra "gospel" ta

aliba reprangdangyonga Khristan dak sendakba osettem kecha malir.

China nung WeChat dang masü saka Christian websites aika shibangtsüogo; yamaji China nung Khristantem atema media aser Internet jenjang tamajungba akümer.

Christian social media content producer, Wen Liang-i, "Christian WeChat official accounts kar nungbo oset shiaji nisung meyrjang aikati azünger, ibayongji Khrista osangtajung kanga proker. Ajisüaka item ama media nokdangba ajanga Internet nung osangtajung prokba tsütsü mejungi kongshitsü," ta metetdaksü.

ANOGO ABEN TSÜNGREM DEN

Obendangba menden

"Kechiaser nisungshia iba temang nung inyakba mapa yari tajung süaka, tamajung süaka angutsü asoshi asenok ajak Khristar obendangba madang jungkai adoktsüla." 2 Korinth 5:10

Tamangertem mejeta obendangba menden ka lir, iba dangji BEMA ta ajar, aser idaki asenok aitsütsü atema masü saka asenok nem asen tamanger ka ama aseni kechi mapa tajungsa inyaka lir iba indang senpet agütsüba mapang asütsü.

Jungkai adokba 2:23b nung ashi ama 'Aser Ni mulungsentsü aser temulungjang bushiba lir ta arogo ajaki metetsü aser nenok nisung shia nem pei mapa yari agütsütsü' Mark 9:41 nung '...shibaisa nenok nem tzü marok ka danga jemdaktsüdir, adangji ni nenok dang ashir, pa pei tajangzük koda-kang mesamatsü'. Tsüngrem sentsüwangshi asoshi aseni kechi mapatempa inyakeraji Pai züluoka yudagi. Aria bilemba temeim mulungsentsü tener asenoki mapa tajung inyakdi arungma. Yaa alidang chiyungtsü agütsürtem, tzüraa alidang jemdaktsürtem, aeenersa alidang aniokertem, mangsa alidang abentsürtem, shiranga alidang semdangertem, tepuokdak alidang oa ajururtem (Mathi 25:34ff) asenok südi.

SARASADEM

Kibuba, nai 'arungma Kebui moatsürtem, nenok asoshi alima yangludang nungi renema akaba yimli senmang amangang' ta ashidang nia densemdakjangma. Amen

Pakistan nung Muslim nungeri Khristan ana miim chisema südaktsü

Islamabad, July 14, 2021

(Agencies): Pakistan linük nung tatalokba balala ana nung Muslim nunger den mangatettep adokba sülen Khristan tebur ana miim chisema südaktsüogo, ta International Christian Concern (ICC)-i metetdaksü.

Khristan ana südaktsüba tatalokbaji bushisüngdang tenzüko.

March 6, 2021 nü Pakistan nung Sahiwal district kübok 190/9AL yimdak Khristan, Samuel Masih aser mapa külemi inyaker Muslim nunger tsüngda Khristantemi lumiba onük nung o toktepba sülen Muslim nunger jagi pa nem miim chisema südaktsü. Ghala Mandi Police Station nung benokba FIR nungji, Masih miim chisema südaktsü, ta shia lir.

Tamasabo police-i FIR benoktsü memelungi liasü, ajisüaka Masih'er kinüngertemi yimti-yimdong nung longkak aitba sülen ang police-i FIR benoka bushisüngdang tenzüko.

May 23, 2021 nüa Gojra yimti anasa 370/GB yimdak Muslim nunger Muhammad Tariq aser Muhammad Majid nati arrshi küm 32 Khristan, Arif Masih miim chisema südaktsü.

FIR nung shia aliba agi, Muslim nunger ana jagi Masih apuba sülen memetetba tesem kati anir oa reshikangshiba sülen pa nem kangshia langka chidaktsü. Iba sülen Masih hospital nung treatment tagidak mapang nung asü.

Osang angazükba agi, tamalen Masih-i Muslim nunger anaji anema ken o ka benoka liasü, aser pai iba ken oji agientsü memelungba agi pa reshikangshia südaktsü.

Pakistan nung tsüngrem mezüngmeshiba ozüngtem nung ajemdaker Khristan densema minorities nem tai tongloktsür, loktii nisung tepseter aser Khristantem anema longkak aiter.

Tang Pakistan linük nung tsüngrem mezüngmeshiba ken otem nung aija Khristan 24 tashi tepuokdak lir.

OLONG PAITEP # 5875

1				2						3		
4									5			
							6					
				7								8
		9										
									10			
11												
13												

TIPIEN		LANGTSÜNGLEN	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

OLONG PAITEP # 5874 TELANGZÜBA

TIPIEN :	LANGTSÜNGLEN :
1. Yimlibilem, 4. Anak, 5. Tangar,	1. Yongya, 2. Moko, 3. Marok,
7. Aya, 8. Arong, 11. Par,	5. Teronem, 6. Nung, 8. Amajok,
13. Lemjem, 14. Oagi, 15. Mulung.	9. Jangzü, 10. belem, 12. Rong.



COVID-19 PANDEMIC MAPANG TEMENÜNÜTSÜ ATALOKBATEM :

- Saditsü atema tenlakidangbo nisung tenem(50) dang atentsü melar, sentep temerbo reception nungbo nisung merijang ana asem nungzüteper. Tenla kidangbo corona mesen lir saka chiyungdakbo maliana?
 - Anogoshia Tzümar tembo yokya-yokjitsü Nagaland gate ajanga atupet atur saka asenok Naga nungerbo Lock down tenüng nung meyoker.Asenok nungiang coronaji belenshirana?
 - Cari tem odd-even amshia anogo melentepa senzüdangya odd puri even pur dak menaloktsütsü mesüra even puri odd pur dak menaloktsür ta a na?
 - Social distance maintain asütsü jembiaka farm Tulu akartemi pick-up truck nung labour tem tango moi tsünger anishidang yabo corona ji memenateper, saka alu inyakdangjibo yard anana yur inyaksüla.
 - Tenüngbo face mask saka agidangbo teküm(chin) nungang agir.
- Reporter : Alokba. Lilir : WhatsApp

TANÜBO NAI LANGZÜANG

Q. Navegaon-Nagzira Wild life Sanctuary ya ____ küm Tiger Reserve aküm.
 A.2021 B.2020 C.2013 D.2017
 _____(Taruba adok nung onoki langzütsü)
YASHI ADOK TELANGZÜBA : Gujarat

AO OSHI ANGAZÜKDAK:
TANÜ ANGAZÜKTSÜBA OJANG

Kidachir
 (n) nükta pangta ajanga abenba chir (illegitimate child)
 * Par tanurtem rongnung **kidachir** ka lir.

Asangchi
 (n) tebu memetetba chir (bastard)
 * Tanurji **asangchi** asüyonga pai pei chir ama kümer meimer.

NAI-A YA METETTER MA?



Odishastate kübok Bhadrak district nung wakong sentsü (yellow) hano (turtle) ka ngutet ta forest ketdangsür temi ashi tawa sangdongogo. Osang ajanga angazükba agi, Bhadrak district indang Chandbali block nung Hombarnü (12.07.2021) tesayur kati iba hano ngua kümzük aser iba hano touzük seret 2 shi lir. Pai (tesayur) forest ketdangsür nem iba hano agütsü. Iba sülen, ketdangsürtemi Baitarani ayong nung iba hano chiok.

SUDOKU # 5915 TELANGZÜBA # 5914

3	9					4	6	4	7	9	6	3	8	2	5	1	
			9	3	7	2	8	5	2	3	9	7	1	6	8	4	
	7			6			5	8	6	1	4	5	2	3	7	9	
	1	3		2		8	6	1	3	8	5	9	7	4	6	2	
2				9	3	1		7	6	9	5	1	2	4	8	3	7
				1	8	4		2	7	4	2	3	8	6	1	9	5
8							2	1	3	1	4	7	6	5	9	2	8
	3			5			7	4	9	8	7	2	4	3	5	1	6
5		4	1	7		9	8	3	2	5	6	8	1	9	7	4	3

OJANG LUTEP # 5460

- JUNTAG :
- AKAJ :
- IPE :
- IANDNG :
- ÜMKA :
- ZÜDAPENNG :
- NGKIDAI :
- KATE :
- ZÜNTAG :
- ANGSHIL :

OJANG LUTEP TELANGZÜBA # 5459

TEJANGJA KULI MAKAI TANGAR DANG
 TAI APUTSÜ MERANGBAJI OZÜNGI MEMELAR

TAN HOPTA ATEMA - KOMA SÜLA ?

Q. Naga yimten tebilemtesü ya tang amai tatembang küma melatettet, ano, küm ter süi nunga koma süla ?

PM Modi leniba nung Union Cabinet senden amen



New Delhi, July 14: Tzüngluruwa mongpu Parliament tenzüksü mapang ana nung lia Bodhbarnü Ato kilonser, Narendra Modi leniba nung Union Cabinet senden amendang tangokba noksa nung angur.

New Delhi, July 14 (Agencies): Tzüngluruwa mongpu Parliament tenzüksü anogo ishika dang lia Bodhbarnü Ato kilonser, Narendra Modi leniba nung Union Cabinet senden menogo. July 7, 2021 nü Cabinet ulushiba sülenbo tang mezüing Ato kilonser, Modi-i Council of Ministers den senden amen. Union Cabinet ulushiba sülen Ato kilonseri council of ministers denbo jurila senden aika mena liasü.

Osang angazükba agi, Bodhbarnü senden nung Ato kilonseri Minister tem dang, tesüiba anogo ishika linük tesem balala nung lokti tulu adenshiba aser mask magii nisung anasatepa senzütepba noksa aser video aika prokshidar, anungji coronavirus wara anema raraba agi asenek melung sür malitsüla, ta metetdaksü.

Hombarnü Central sorkari Cabinet Committee balala tentetshiba sülen tanü Union

Cabinet senden amener. Cabinet Committee on Political Affairs (CCPA) nung züngsemtemji Bhupender Yadav, Sarbananda Sonowal, Mansukh Mandaviya, Giriraj Singh aser Smiriti Irani nunger lir. CCPA nungsa Ato kilonser Modi, Defence Minister Rajnath Singh, Home & Cooperation Minister Amit Shah, Road Transport & Highways Minister Nitin Gadkari, Finance & Corporate Affairs Minister Nirmala Sitharaman, Agriculture Minister Narendra Singh Tomar, Commerce & Industry Minister Piyush Goyal aser Parliamentary Affairs Minister Pralhad Joshi nunger densema lir.

Cabinet Committee on Parliamentary Affairs nung Law Minister Kiren Rijiju, Information and Broadcasting & Sports Minister Anurag Thakur aser Tribal Affairs Minister Arjun Munda nunger züngsem tasen züngokogo. Iba Committee nung Union

Ministers- Rajnath Singh, Amit Shah, Nirmala Sitharaman, Narendra Singh Tomar, Arjun Munda, Pralhad Joshi, Kiren Rijiju aser Anurag Singh Thakur nungera züngsem lir.

Cabinet Committee on Investment & Growth nung züngsem tasen- Civil Aviation Minister Jyotiraditya Scindia aniokogo. Iba committee nung Modi, Rajnath Singh, Amit Shah, Nitin Jairam Gadkari, Sitharaman, Piyush Goyal, Narayan Tatu Rane aser Ashwini Vaishnaw nungera lir.

Cabinet Committee on Economic Affairs nung Modi den Union Ministers Rajnath Singh, Amit Shah, Nitin Gadkari, Nirmala Sitharaman, Narendra Singh Tomar, S Jaishankar, Piyush Goyal, aser Dharmendra Pradhan nunger lir aser Cabinet Committee on Accommodation nung züngemtemji Union Ministers Amit Shah, Nitin Gadkari, Nirmala Sitharaman, Piyush Goyal aser Hardeep Singh Puri nunger lir.

Union minister Piyush Goyal Rajya Sabha nung House lenir shim

New Delhi, Chiteni/July 14 (Agencies): Union minister Piyush Goyal Rajya Sabha nung House lenir shimogo, ta Bodhbarnü osang ka ajanga metetdaksü.

Pai Thawar Chand Gahlot melenzüksü, kechiyong Gahlot Karnataka Angh shimogo.

Parliamentary Affairs Ministry-i Rajya Sabha

Secretariat dang, Rajya Sabha nung House lenirji Piyush Goyal asütsü, ta metetdaksüogo.

Goyal ya tang agi kümsük anabuba Rajya Sabha MP lir, aser tang pa NDA nung deputy lenir aser Cabinet nunga Union Minister lir.

Pai ministry aika agizükogo, aser item rongnung commerce & industry, food & consumer

affairs aser textiles ministry densema lir.

Piyush Goyal 2014 küm Minister shima liasü, ibaji masüadang pa BJP treasurer inyaka liasü aser election mapang nung pai election nüboyim ketdangsüba den külemi party atema election dak sendakba maparen ajak pai achaayanga liasü.



India nung petrol aser diesel totzü jenjang maneni atuba anema July 14, 2021 nü Kerala yimtiba, Thiruvananthapuram nung Raj Bhavan kima Youth Congress-i longkak aitba sentong nung party lenir, Ommen Chandy-i jembiba noksa nung angur.

S Jaishankar SCO FM senden nung aden

New Delhi, July 14 (Agencies): Bodhbarnü Tajikistan yimtiba, Dushanbe nung Shanghai Cooperation Organisation (SCO) foreign ministers senden tenzükogo, aser iba senden nung India External Affairs Minister, S Jaishankar-a dendar.

Bodhbarnü SCO senden nung tongtibangsa tang Afghanistan lintük nung security tensa atema jembio.

External affairs minister S Jaishankar-i twitter ajanga, "SCO FMM senden tenzükogo. Taküm agi küm 20buba senden ya asenoki inyaktetba asadangtsü aser tayongzükba balala atema o lemtepsü asoshi maongka tajung ka lir. Tongtibangsa Afghanistan aser Covid wara koktettsüji tayongzükba tulu lir," ta metetdaksü.

Iba senden nung shilem agia adener lenirtem rongnung

Russia foreign minister Sergey Lavrov, China foreign minister Wang Yi aser Pakistan foreign minister Shah Mahmood Qureshi nunger densema lir.

SCO ya NATO atema tongti tentet ka lir. 2017 küm India aser Pakistan linük nata SCO nung Permanent züngsem aküm.

SCO ya 2001 küm Shanghai nung Russia, China, Kyrgyz Republic, Kazakhstan, Tajikistan aser Uzbekistan linüktem nungi Tirtem senden amenba mapang nung tenteta liasü.

India-i SCO aser Regional Anti-Terrorism Structure (RATS) den security tsütsü tesendaktep tajung yuner; SCO kübok RATS yagi security aser defence atema inyaker.

2005 küm India ya SCO nung Observer liasü aser SCO ministerial-level sendentem nunga India-i shilem agia aruba sülen 2017 küm iba telok nung Permanent züngsem aküm.



Mumbai, July 14, 2021: Maharashtra nung coronavirus wara anema tenokdangba agienba sülen Bodhbarnü Mumbai nung aliba market ka nung nisung nungtepba noksa nung angur.

India nung ano nisung 38,792 dak Covid putet

New Delhi, Chiteni/July 14 (Agencies): India linük nung ano nisung 38,792 dak coronavirus tashidak putetogo aser iba tashidak agi shiranger 624 süogo, ta Bodhbarnü Union health ministry data ajanga metetdaksü.

Tang tashi nung India nung iba tashidak agi shiranger 4,11,408 süogo aser nisung 3,09,46,074 dak coronavirus putetogo.

Tesüiba ghonda 24 tsüingda coronavirus agi shiranger 41,000 anepogo; hopta shia coronavirus positive putetba

shilem 2.25 dang kümogo aser anogo shia positive putetba shilem-a 2.10 dang kümogo, ta Health Ministry-i metetdaksü.

Tang tashi nung coronavirus vaccine dose crore 38.76 agütsüogo aser tang teshirangdakpur

4,29,946 dang kümogo, aser ibaji coronavirus caseload nungi shilem 1.39 dang lir.

Mongolbarnü samples 19,15,501 tendanga liasü aser tang tashi nungbo samples ajak senteper 43,59,73,639 tendangogo, ta Health ministry-isa metetdaksü.

Parliament jakdang Centre-i Party ajak senden ayonger

New Delhi, July 14 (Agencies): July 19, 2021 nungi tzüngluruwa mongpu Parliament tenzüksü lia Centre sorkari Amongnü ((July 18) yimtenren party ajak külem senden ka ayongzükogo; Parliament senden junga agitetsü atema parliament jakdang party ajak senden ayonger.

Iba senden nung adentsü

atema Parliamentary Affairs Minister, Pralhad Joshi-i yimtenren party balala nungi lenirtem jaokogo. Iba senden nung Ato kilonser, Narendra Modi-a adentsü.

Tzüngluruwa mongpu Parliament July 19 nü tenzüksü aser August 13 nü tembangtsü, aser senden agiba piyong coronavirus dak sendakba tetuyuba ajak shidak benshitsü.



Taoba kum Beirut nung rong anendak tesem ka poksadang asüba kinunger ka Beirut, Lebanon nung aliba caretaker Interior Minister Mohamed Fehmi'er kidangi aitsü merangdang police den raratepdang yirur azü ayimba noksa nung angur. Iba lendong nung asüba kinungertem ya Fehmi dang mepelar, kechiaser iba lendong bushisüngdang obendanger kati Maj. Gen. Abbas Ibrahim asüngdangyatsü asüngdangba pai magizük. Ibrahim ya General Security Directorate nung tekolakba aser Lebanon nung tejangja mitkar lenir ka lir.

Taliban-i Afghan-Pakistan arrtsülen tongtipang tesem agi

Kabul, Chiteni/July 14 (Agencies): Pakistan den arrtsülen Spin Boldak border crossing agiogo, ta Taliban-i ashir, shirnoki Afghanistan nungi bendanger sepaitem ainshiba sülen linük tesem balala par küboki aitdaksür.

Saka Afghan interior ministry-ibo Taliban teloki amakba aridokogo aser sorkar indang sepai kübok lir, ta Bodhbarnü ashi.

Külen Pakistan ketdangsürtemi par tsütsü Afghanistan den arrtsü alema senzüba Chaman-Spin Boldak frontier shibanga lir, ta osangbener dang ashi.

"Chaman nung Pakistan den arrtsülen Afghan tsütsü Taliban telok aliba angur saka Afghan (sorkar) sepai Afghan arrtsülen mali," ta Pakistan tsütsü yangji ketdangsür Arif Kakar-i osangbener dang ashi.

Pakistan-i tang Chaman-Spin Boldak nung aliba arrtsü alema oset mesüra nisung mesenzüdaksür, ta Kakar-i ashi, koba linük ana tsüngta arrtsü alema senzüba tesem tongtipangtiba ana rongnung ka lir.

Yangji alirtemi video tangokba nung Spin Boldak tsütsü Afghan sorkar indang nisan songa aliba Taliban indang sentsü temesüng nisan agi melen, aser iba tetetzü Afghanistan ya Islamic Emirate of Afghanistan ta sayur alitsü.

Arrtsülen aliba jila nung Taliban züngsemtem anisüngzüka aliba noksa agi social media sünga lir.

Tawa Taliban teloki arrtsü alema senzüba tesem aser tzi konger aliba rong anendak tesemtem aika agia aruba rongnung Spin Boldak ya tang tesüsaba alitsü, aser parnoki Kabul nung aliba sorkar nungi kanga nungdaka aliba saru agizüktsü meranger.

Kandahar province ajungalen anogo aika khatepba sülen iba tesem ya Taliban

küboki aitdaksür. Kandahar province indang yimtiba Taliban küboki aitdaksütsü aliba nungi nokdangtsü mechi sorkari commando tem yoktsüsa akum.

Taliban odongtar Zabihullah Mujahid-i sangdong ka nung yangji aliba nübur aser shishilepartem dang parnok takum kumzüka ayutsü, ta shia liasü.

Saka Afghan ketdangsürtemi iba tesem ya tang tashi par kübok lir ta ashir.

"Taliban kiralongrartem arrtsü anasa senzüsempogba lir... Security forces temi parnok aridokogo," ta interior ministry indang odongtar Tareq Arian-i osangbener dang ashi.

Ajisüaka yangji alirtemibo sorkari ashiba magizüker.

"Ni tanep ozü dokan-i aodang tesem ajaklen Taliban liasü. Parnok bazaar, police headquarters aser custom area ajunga nung lir. Anasa khatepba ola ni angashi," ta arrtsü anasa dokan kibur Raz Mohammad-i ashi.

Afghanistan nungi United States sepaitem ajunga anizüker aotsü hopta ishika anünga lia, Taliban teloki linük tesem timba agiyonga arur, aser tang sorkar kübok provincial capital tem timba anüngzüka lir, kong tayimtsü ajanga teyari agütsütsüsa akumtsü.

Spin Boldak border crossing ya Taliban atema jenjang tulu aketba tesem tongtipang ka lir. Iba tesem nungi Pakistan nung aliba Balochistan province-i indang-indanga oteter, kong par telok nung lenirtem kum aika amenoker lia aru, aser ano par telok nungi tongpang nung nokdakra züngdangtsü mokoki anidena liasü, aser mapang shia Afghanistan-i aita par telok tashi itshidaksü.

Taliban küboki iba arrtsü alema senzüba tesem aitdaksüba sülen Pakistan tsütsü nungi osangbener temi Taliban züngsem 150 shi

motorcycle nung mener par nisan amer senzüba angur aser parnoki arrtsü alema Afghanistan-i aitsü melang ta takhangba agüja liasü.

Taliban sepaitem asoshi Balochistan ya tongtipang tesem ka lir, kong parnok temang anepalutsü oa amunger aser parnok kibongtema aika yangji lir.

Iba tesem nung Afghanistan arrtsülen nungi tongtipang highway Pakistan indang shishilempaba yimti, Karachi aser Arabian Sea nung rong anendak tesem tuluka den sendakteptsür.

Afghanistan nung aliba district aser district centre 421 nungi shilem asem dak tema Taliban kübok lir südi, ta amanger.

District aika kanga tongtipang lir, aser Iran, Uzbekistan aser Tajikistan den arrtsüa lir.

Taliban tashi ulua akumba ajanga Afghan National Security and Defence Forces nung tashi maitba sayur. District aika nung merarai Taliban küboki aitdaksü aser Afghan sepai 1,000 dak tema Tajikistan-i jena oa liasü.

South Africa nung longkak aitertemi sepai ashi mangar

Johannesburg, Chiteni/July 14 (Agencies): Yimti balala rongrong adoka aliba azüoktsü asoshi South Africa Tir Cyril Ramaphosa-i sepaitem yokaka Mongulbarnüa store aser warehouse nung tashiyim amshia osettsüset auyartemi kongshia liasü.

Ochimashi ken o bushisüngdangba nung okadak arua menokdakba yong South Africa indang taoba Tir Jacob Zuma taoba hopta apuba anema yimti balala nung nüburtemi longkak ait tenzüka dokan tem kakpoka auyar aser tangbo nüburtem tim atema tejashi ajak tokzüka sayur.

Iba lima nung temesüng nisungtemi mejetteta yimsü asüba yimya melenshir kum 27 shi aruaka nüburtem jenjang tajungba makumer.

Kasa mapang COVID-19 tashidak prokshia aoba nokdangtsü mechi loktiliba aser rongsenketzüng nung tenokdangba agütsüba ajanga makamait tali shisanga akum.

KwaZulu-Natal province nung Zuma'er ki alidak nungi linük nung yimti tulutiba, Johannesburg aser temeket

Gauteng province aser Indian Ocean nung rong anendak Durban yimti tashinung kongshia rongrong adokba aser rakzük-raktemba azüoktsü asoshi sorkari inyakteper, ta security ketdangsürtemi ashi.

Rongrong adoka aliba azüoktsü merangba nung tamakok ajurua aliba police tem yaritsü atema mitkar züngsem 2,500 yoker ta ashi. Saka taoba kum coronavirus lockdown ozüng benokba mapa kuma inyaksü atema sepai 70,000 dak tema yokba ajanga ketdangsürtemi ashiba ama mitkartem marutet aser kar dang shopping centre kar nung liasü.

"Longkak ait tenzüker nisung asür ajak senteper 72 kumogo. Asürtem ya timba dokan kakpoka ayuaba mapang ajemsetba alitsü," ta police temi Mongulbarnü sangdong ka nung ashi.

Saka karbo kasetba aser ATM poksatsüadang asüba lir.

Yimti balala nung ki-o-jen raksaja aser dokan balala rakpoka rakzük-raktemba nung shilem agir nisung 1,234 pua lir, ta ashir.

China-i Pakistan dang bus amaker merenshitsü ashi

Islamabad, Chiteni/July 14 (Agencies): Northwestern Pakistan nung Bodhbarnü bus ka nung bomb poka nisung 13 asü, aser parnok rongnung China nung nisung 9 liasü, ta sorkar aser police ketdangsürtemi ashi.

Iba lendong atalokba ya bushisüngdangba mapang lir, ta Pakistan ketdangsürtemi ashi, aser Islamabad nung aliba Chinese embassy ajanga par senso dak amak, ta ashi.

China-i iba lendong agütsür tekeratiba nung aputsü ashi. Iba lendong aitsüba mapang Foreign Ministry indang odongtar Zhao Lijian-i Pakistan dang iba mapa inyaker tashi agi merenshitsü aser linük nung China nung, lokti tentet aser project tem kumzüka ayutsü

ajungshia liasü.

Iba bus nungya Khyber Pakhtunkhwa province nung Dasu tzi-nokdang yangluba mapa inyaker China nung engineer, surveyors aser mechanical staff tem mena liasü, ta yangji aliba sorkar ketdangsür kati pa tenüng miimshia ashi.

"Iba bomb apokba ajanga gol nung mi adok aser bus ya yong tarok nung lua mükepok. Iba lendong nung China nung nisung 28 yiru," ta pai ashi.

Pakistan nung China nung mapa inyaker takum kumzüka ayutsü ya mapang talangka nungi khuret süa arur. Parnok aika Pakistan nung ki-o-jen yangluba nung yariteptsü arua alir.

(Maneni tapak 9 nung...)



Pakistan indang Khyber Pakhtunkhwa province kübok Kohistan district nung bus ka tsükoka alidak yangji alirtem aser ketdangsürtem adenshiba noksa nung angur. China aser Pakistan nung kisü-jensürtem mena aliba bus ya Pakistan northwest tsütsü Bodhbarnü lenmang tanüla nung jajadang mükepoka China nung nisung trok densema nisung ti asü.

Wokha DTF senden nung tashidak mapang shidak nung tendangtsü nenshia jembi



Dimapur, Chiteni/July 14 (TYO): July 13 nü COVID-19, District Task Force, Wokha jongdak senden ka DC conference hall nung ayongzüka menogo. Deputy Commissioner aser DTF Wokha mendenbuba, Orenthung Lotha-i district nung COVID-19 tensa asdangshia liasü.

Chief Medical Officer aser Dy. CMO, Wokha-i district nung COVID-19 wara jenjang indang metetdaksü aser ashiba agi, district nung tang tashi nung nisung 35,560 nem vaccine agütsüogo aser random test agiba mapang sample 3,856 bendenogo. District nung tang tashi nung random test 16 ben agiogo. District nung tang tashidak agi tonger nisung 255 temang anepaludar aser tashidak agi nisung 9 süogo. Kasa mapang nung positivity rate 6.61%, recovery rate 83.78% aser death rate 3.47%,

lir ta paisa metetdaksü. Senden nung mendenbubai wara den raratsü asoshi pei akokba yari bendanga agüja inyaksü ajungshiba den district nung tashidak menar tajemba kümdaktsü aser COVID wara prokshi aoba nokdangtsü atema random testing aser lokti nem vaccine agütsüba sentong asendenshir inyaksüla ta ashi. Iba dak sendakba nung CMO-i, district kübok health care centers tem nung vaccine agütsü aser tashidak tendang tenzüko, ta ashi.

Deputy Commissioner-isa, nisung kari social media sabangtem nung mejangjaba aser osang taila prokshir ta ashiba den iba amala inyakyim ya merenshitsü langa lir aser Nagaland Disaster Management Act 2005 aser Nagaland Epidemic Diseases (COVID-19) Regulations 2020 kübok merenshitsü ta shia

nüburtem dang iba amala inyakyim nungi pilaa alitsü ayongzüük.

Lotha-isa, DTF-i vaccine aser tashidak tendangba ken o dak sendakba nung Nodal Officer asütsü asoshi SDO (C), Chonpenthung Ezung shimba metetdaksüba den ketdangtsür den tongteprateptsü mepeshia metetdaksü. Maneni DC-i Superintendent of Police, Wokha dang ODD & EVEN basis nung gari senzügenpong kanga junga azüoktsü metetdaksü.

Senden nungsa Medical Officer, Wokha Dr. Chumdemi district nung COVID-19 achayangba indang metetdaksü aser Rapid Response Team (World Health Organization) züngsem Seyiekhrienuo-i Wokha district nung wara asadanga indang metetdaksü.

July 13 nü DC office kima DC staff aser tanga department nung inyakerem 52 indang sample bendena tendang saka parnok ka dak danga tashidak meputet. Tashidak medendang tsüngda ADC, Wokha, Lankonsen Tsanglao aser SDO (C) Chonpenthung Ezung nati, vaccine agitsü aser COVID dak sendakba yimayimpong shidak benshitsü koda tongtibang, iba indang lemsatep

AR-i Kukidolong nung sentong ka ayongzüük

Dimapur, Chiteni/July 14, 2021 (TYO): HQ IGAR (North) kübok Ghaspani Battalion - Assam Rifles-i Mongolbarnü Kukidolong nung tetsürtem atema awareness campaign ka ayonga agiogo, ta sangdong ka ajanga metetdaksü.


Iba sentong shilem ama, tetsür densema lanurtem dang team-i Women Military Police, Assam Rifles meritorious sportsman recruitment, SSC exams aser State service nung mapa maongka balala indang

metetdakja liasü. Item exam atema renemshitsü aser registration mapang Assam Rifles-i parnok yaritsü asoshi nangzüko. Iba ama awareness sentong ayonga agiba den külemi mapa maongka atema tetsür aser lanurtem yaritsü nangzüka atema lisopurtemi Assam Rifles dang pelaba metetdaksü.

Maneni, HQ IGAR (North) kübok Shamator Battalion Assam Rifles-i July 10 aser July 13, 2021 nü Choklangan

aser Nokhu tsüngda lenmang nung anentsüh kanga mejungi alur aliba agientsüogo. Security Forces aser lisopur ajak sadema senzügenbongtsü asoshi AR-i tesem ana tsüngda anentsüh agiena liasü. Anentsüh aluba tesem nung Assam Rifles aser Choklangan yimertem longjemer lenti tiyong nung lung tulu meküba agienba ajanga Choklangan aser Nokhu lenmang nung tenokdangba kecha meli nüburtem sadema senzütettsü, ta kasa sangdong nung shia lir.

'The Legend of Zelda' cartridge ka sen cr. 6.4 yong ayok



Mumbai, Chiteni/July 14, 2021 (Agencies): Alima nung otsüsütsüsa, Nintendo NES console tejenba atema yangluba game - "The Legend of Zelda" indang cartridge ka dollar 870,000 (Sen cr. 6.4) yong yokogo, ta sangdong ka ajanga HeritageAuctions-i metetdaksü.

Iba game indang cartridge ya 1987 küm yanglu aser iba cartridge mezüng adok ama khen danga melapok tasen liasü. The Legend of Zelda ajanga 1986 Super Mario Bros cartridge indang record ajatetogo. April ita 1986 Super Mario Bros cartridge ya dollar

660,000 yong yoka liasü, ta Heritage Auction-isa ashi.

Heritage Auction-i The Legend of Zelda ayokba jenjang dak alaka iba cartridge talir tenüng memetetdaksü.

Video games putiotsü nung, adventure, action aser ain aketba alima tem bushia senzüba otsütem abensaa aliba - 'Zelda' ya game asayatsü janngar aikati sapua asayaogo aser iba game ya Nintendo indang nüngtugu series ka ama züngshir.

Tesüiba küm ishika nungi, collector temi video game tejentem sapua bendenba osang balala ajanga angazüker. Ano külen, Auction nunga akhi indang game console aser cartridge (Meraksai tasen-tasen auyuba) tem jenjang aikati yokogo.

MULUNG NEN O



LATE KILANGSUNGBA
TASÜBA : 02/07/2021

Onoki teti meima aliba arishir Tebu tajung asür Kilang Sungba, Mopungchuket (Rtd. Teacher) akümlü wadang tembanger Kibuba kidang anisüngzüker.

Pa temeim mapa aser ajak den sako litetba sempet tajung onok nükdang teti alitsü.

Pa asüku mapang kija, kibong aser lokti kwikati sarasadem, rongsen aser nubu agi yariogo, tongtibangsa Dr. I. Chubatoshi Ao, Nurses & Staff, Impur Christian Hospital ammag agi sangwa kuma yariogo ajak dang kangasa pelar.

Lepa motsüsang Tsüngremi taochi nenok taküm shia den tenang ta sarasademer.

Temeim Kinungtsü, Chirnur, Semchisemnur, Anük-abang aser Kinungertem.

HAPPY 83rd BIRTHDAY Mrs. MATEMSHILA (KANGTSÜNG) Aitlenden , Tuli Town.



~ From all your loved ones.

OFFICE OF THE ASANGMA VILLAGE COUNCIL

P.O. Tuli - 798618

Dist. Mokokchung, Nagaland

SANGDONGER

Mr. Kunish s/o Lt. Khokyn (Halwating) Assam, pai Asangma Student's Union tenüng menükja tiazü olu-lu penshiba atema pa 12th July 2021 anogo nong Asangma Reongsanger Tata Mendeni jaoka tapet temerenshi akiba osang sangdonger.

(I. KILANG JAMIR)
Chairman

Asangma Village Council

(S. NOKDEN LDR)
Secretary

Asangma Village Council

China-i Pakistan dang bus... (Tapak 8 nungi...)

"Pakistan nung Chinese firm ka indang project kar nung lendong ajurur, aser ibaji ajanga China nung asür," ta Chinese embassy ajanga Bodhbarnü sangdong ka nung ashi. Parnoki Chinese firm dang security inyakyim akangshitsü ajungshia liasü.

April ita southwest Balochistan kübok Chinese ambassador anenzüka aliba hotel tulu ka nung takum bendanga agütsür bomb poklokja liasü, saka ketdangtsür meyiru kumzüük. Iba lendong ya Pakistani Taliban temi agütsü ta par sasa tenüng agi.

Pakistan nung Afghanistan den arrtsüa alidak kisüng masü saka linük yimtiba, Islamabad densema yimti aika nung tawa lendong agütsüba asoshi iba

telok yagi tenüng agia liasü.

Afghan arrtsülen Pakistan Taliban tem tanaben adenshir, ta tawa osangtem ajanga ashi, kechiaser sepaitem den mapang shia raraba tenüng parnoki ashir.

Pakistan nung ki-o-jen tsütsü terenlok lidaktsütsü mechi Beijing-i küm ishika tsüngta sen dollar billion aika iba linük nung indoker. Ajisüaka separatist teloktemi China-i senotsü teyari agütsüba project tem magizüker, aser yangji alirtem ajangzüka kangabo mali aser mapa timba bendangeri inyaker, ta parnoki ashir.

Taoba June ita Baloch telungpur temi Karachi nung aliba Pakistan Stock Exchange nung tenük yoker amak, koba shilem kar China nung company balala meyong lir.

Babar Azam-i ODI century 14 takaratiba yangluogo



Chiteni/July 14, 2021 (Agencies): Pakistan captain Babar Azam, ODI nung century 14 takaratiba yangluba asayar kumogo. Pai iba alizüing ya Edgbaston, Birmingham nung England den tasembuba ODI asayaba mapang asaya 81buba nung tongteta liasü.

Azam ya Pakistan nung captain tem rongnung England nung ODI century yangluba tanabuba captain kumogo. Captain tem rongnung taoba mapang Imran Khan kija England nung century ka yanglur liasü. 1983 kum World Cup nung Sri Lanka den asayaba mapang pai run 102 yanglu. Edgbaston nung

century yangluba sülen Azam ya England nung England nung den asayaba mapang century yangluba mezüingbuba captain kumogo.

Century takaratiba yanglurtem rongnung Babar sülen Hashim Amla (84 innings), David Warner (98 innings), Virat Kohli (103 innings) aser Quinton de Kock (104 innings) lir.

England nung asayaba mapang tiben tashi run tenem dak tema yangluba sülen Azam-i England nung ODI asayaba mapang run tenem dak tema timtiba yangluba atema Mohammad Yousuf aser Zaheer Abbas nati record

yanglur aliba ajatetogo. Mohammad Rizwan den (third-wicket partnership) run 179 yangluba ya Pakistan nung rongnungi England nung nisung ana senteper run timtiba yangluba kumogo. Kasa mapang nung pai run 158 yangluba ya Pakistan nung asayartem rongnungi England nung ODI asayaba mapang run timtiba yangluba lir.

Mezüingbuba ODI ana nung khen 0 aser 19 ta yangluba sülen Tasembuba ODI nung pai ball 139 nung run 158 yanglu..

Maneni Azam ya Pakistan nung captain tem rongnung ODI nung run 150 yangluba mezüingbuba captain kumogo. Pai run 158 yangluba ya captain tem rongnung run timtiba yanglur Kapil Dev (175*) aser Glenn Turner (171*) na sülen tasembuba nung lir.

Azam-i tang agi tasembububa England nung century yangluogo. Mezüingbuba century ana ya 2019 kum World Cup nung England aser New Zealand den asayaba mapang yanglua liasü.

Takok angur athlete nem senpet sen cr. 6 agütsütsü: CM Yogi

New Delhi, Chiteni/July 14, 2021 (Agencies): Uttar Pradesh State nungi shilem agitsüpur athlete tem, shirnoki Tokyo Olympics nung medal takok ngudir, parnok nem state-i senpet sen tulu agütsütsü terenemba lir, ta sangdong ka ajanga chief minister Yogi Adityanath-i metetdaksü.

Kija telemsa nung Gold medal takok angur athlete tem nem state sorkari senpet sen cr. 6 tashi agütsütsü. Kasa mapang team asaya nung gold medal takok angurtem nem senpet sen cr. 3 agütsütsü. Iba den bendenloksema, July 23 nungi tenzüka asayatsü aliba Tokyo Olympics nung, State nungi kija aser team asayamung nung shilem agir athlete shia nem Sorkari sen lakh 10 (terter) agütsütsü.

Olympics nung India tenüing nungi shilem agitsü asoshi, athlete 126 shi Tokyo-

i aotsü. Covid-19 wara tenokdangba ajanga iba asayamung taoba kum nungi thinena arur sülen tan ita tatemlen tenzüksü sentong lir.

Tokyo Games lapokba sentong nung India contingent atema Boxing asayar takotet Mary Kom aser India tebur hockey team captain Manpreet Singh nati linük wako amtsü. Asayamung shibangba sentong nung, wrestling star Bajrang Punia-i linük wako amer shilem agitsü.

Uttar Pradesh nungi Shooting asayar Saurabh Chaudhary, Mairaj Khan aser javelin asayar Shivpal Singh aser Annu Rani nung Olympics nung asayatsü qualify süogo. Arishi kum 19 tain Chaudhary-i 'men's 10m air pistol' aser temeyokteparep '10m air pistol' nung külem India tsür Manu Bhaker den longjemer gold medal angutsü teimla lir.

Federer, Bianca aser Nick Kyrgios Tokyo Olympics nung masayatsü

Chiteni/July 14, 2021 (Agencies): Swiss nung nungtugu tennis asayar Roger Federer temekok yiruba ajanga Tokyo Olympics nung shilem magitsü telemtetba agiogo. Federer-i iba osang ya Twitter ajanga lemsatep aser ashiba agi, "Switzerland tenüing nungi asayatsü maaangka anguba magitetba atema kanga tezüadanger."

"Grass court season mapang tia maka ni temokok nung timtem adok aser ni Tokyo Olympic Games nung masayatsüla ta agizüktetogo. Ni kanga tezüadanger, kechiyong iba ya tetushi tulu aser kü indang career nung Switzerland tenüing nungi asayaba shia ya kanga tongtibia," ta Federer-i tweet asü.

Arishi kum 39 tain asayar ya tang temang anepaludar aser ita ishika lir asaya tenzüksü imlar.

"Ni rehabilitation tenzüko aser mapa tatsüka tsüingda asaya tenzüksü imlar. Swiss team-i junga asayatsü imlaja atar aser ni talang nungi pusema atatsü. Teti ama Hopp Schwiz!" ta pai shisem.

Wimbledon asayamung quarter-finals nung Federer Poland nung asayar Hubert Hurkacz-i tsükdaksü. Hurkacz-i asayar tejen ya straight set nung koka semi-final atong. Asayamung mezüingbuba round nung Federer, France nung asayar Adrian Mannarino-i tera agi dang metsükdaksü saka pa yirur tuguatok.

2020 kum Federer temekok anaben tashi surgery agia liasü. Pai French Open nunga asaya



Roger Federer



Bianca Andreescu



Nick Kyrgios

asem tashi koker liaka Wimbledon nung asayatsü atema temang wazüka ayutsü asoshi masayatsü telemtetba agi. "Ozü team den sensak asemba sülen ni French Open nung masayatsü telemtetba agiogo. Temekok sursey anaben agiba den kum ka dak tema rehabilitate asüba sülen ni kü temang anepalutsü nungdaker aser komo chijemba mapang kanga kararabo nongshia masayatsüla. Asaya asem tashi koktetba atema kanga pelar. Court-i meyipa arua asayaba dang nungi jangradem tuluba kecha mali," ta pai iba mapang tweet asü.

Bianca Andreescu : Covid-19 wara süshia maoba ajanga aruya aliba Tokyo Olympics nung shilem magitsü lemtetogo, ta taoba mapang US Open champion Canada tsür Bianca Andreescu-i ashi.

July 23 nungi tenzüka August

8 tashi asayatsü aliba Games nungi tesüsa tukadoker tennis asayar rongnung Bianca Andreescu asütsü. La dak alaka, coronavirus wara ajanga anogo atsülanger aliba Olympics asayamung nung shilem magitsü asoshi nungtugu asayar talisa Rafael Nadal, Dominic Thiem, Stan Wawrinka, Nick Kyrgios, Serena Williams aser Simona Halep nungeri osang tejangja sangoktsüogo.

"Tanur asüdüang nungi Olympics nung Canada tenüing nungi shilem agitsü asoshi ni mangdang tulu ayu," ta World no. 5 Andreescu-i ashi.

"Ajisüaka, tang tensa dak sendakba nung tayongzükbajenti ajuruba yong, Olympics nung masayatsü telemtetba agir aser telemtetba shitak agir ta kü sasa bilemer," ta lai ashi.

Arishi kum 21 tain Bianca, shibai Wimbledon nung tesüsa

shilem agi, iba asayamung mezüing round nung la tsükdok.

Canada tenüing nungi Fed Cup ties aser 2024 Paris Olympics nung shilem agitsü imlaa atar, ta lai shisem.

Bianca-i 2019 kum U.S. Open asayamung takok anguba mapang, Grand Slam singles takok angur Canada nung rongnung la mezüing aküm. Ajisüaka, kasa kum Shenzhen nung ayongba WTA Finals nung la tememok yirur külen nungi asayamung balala mapang la temang nung timtem adoka liasü.

Maneni, külem asayar Canada nung Denis Shapovalov, shibai taküm

Wimbledon semi-final tongteta asayaogo, taoba ita pai Tokyo Olympics nung masayatsü osang sangdongogo.

Nick Kyrgios : Taküm Tokyo Olympics nung Australia team nungi Nick Kyrgios masayatsü. 'Asaya mapang terepranger melira tetoktepeba nung shilem agitsü mejangrar' ta pai ashi.

Brehostibarnü, Olympic achaayangertemi ashiba agi, coronavirus wara tanaben adokba asadangteta Japan-i Tokyo nung 'state of emergency' sangdongba sülen iba Games terepranger medeni ayongzüksüsa akümer.

"Iba Olympics nung Australia tenüing nungi shilem agitsü kü mangdang liasü aser tarutsü nung iba ama maangka tanaben mangutsü akok," ta social media sabang ajanga arishi kum 26 tain Kyrgios-i lemsatep.

"Ajisüaka, ni junga shisadanger sülen telemtetba agir. Terepranger mali 'stand' tazüingla nung asayatsü kü mulungi magizüker," ta pai ashi.

Tang asaya aliba Wimbledon nung, Felix Auger Aliassime den tasembuba round asayaba mapang Kyrgios temang nung timtem aliba ajanga, asaya tom nungi pa tukadok.

Aruya aliba Tokyo Games nung Rafa Nadal, Dominic Thiem, Stan Wawrinka, Serena Williams aser Simona Halep nungeri shilem magitsü.

BILEMDANGANG

"Tangar majung indang bilema nü mapang telalu."